

王子安集

王子安集卷之十三

唐龍門王勃子安著

明閩漳張燮紹和纂

碑

益州夫子廟碑

述夫帝車南指遯七曜於中階華蓋西臨藏五
雲於太甲雖復星辰蕩越三元之軌躅可尋雷
雨沸騰六氣之經綸有序然則撫銅渾而觀變
化則萬象之動不足多也握瑤鏡而臨事業則

萬機之湊不足大也故知功有所服龜龍不能
謝鱗介之尊器有所歸江漢不能竊朝宗之柄
是以朱陽登而九有照紫泉清而萬物覩粵若
皇靈草昧風驪受河洛之圖帝象權輿雲鳳錫
乾坤之瑞高辛堯舜氏沒大夏殷周氏作達其
變遂成天下之文極其數遂定天下之象衣冠
度律隨鼎器而重光玉帛謳歌反宗禋而大備
泊乎三川失御九服蒙塵俎豆喪而王澤竭鐘
鼓衰而頌聲寢邵陵高會諸侯輕漢水之威踐

土同盟天子窘河陽之召三徽制度乘戰道而
橫流千載英華與王風而掃地大業不可以終
喪彝倫不可以遂絕繇是山河朕兆素王開受
命之符天地氤氲玄聖舉乘時之策興九圍之
廢典振六合之頽綱有道存焉斯文備矣夫子
姓孔氏諱丘字仲尼魯國鄒人也帝天乙之靈
苗宋微子之洪緒自玄禽翦夏浮寶玉於南巢
白馬朝周載旌旗於北面五遷神器琮璜高列
帝之榮三命雄圖鐘鼎冠承家之禮商丘誕膺

下屬於防山泗水載靈遙馳於汶上禮樂繇其
委輸人儀所以來蘇排禍亂而構乾元掃荒屯
而樹真宰聖人之大業也若乃承百王之丕運
摠千聖之殊姿人靈昭有作之期嶽瀆降非常
之表珠衡玉斗徵象緯於天經贊據龍蹲集風
雲於地紀亦猶三階瞰月恒星知太紫之宮八
柱衡霄羣嶺辨中黃之宅聖人之至象也若乃
順時而動用晦而明紆聖哲於常師混波流於
下閭太陽亭午收爝火於丹衡滄浪浮天控涓

泠於翠渚西周捧袂仙公留紫氣之書東海握
衣郊子敘青雲之袂接輿非聖詢去就於狂歌
童子何知屈炎涼於詭問聖人之降跡也若乃
叅神揆訓錄道和倪辱太白於中都絆乘黃於
下邑湛無爲之跡而衆務同并馳不言之化而
羣方取則雖復霓旌羽旆齊人張夾谷之威八
佾三雍桓氏逼公宮之制泊乎歷階而進宣武
備而斬俳優推義而行肅刑書而誅正卯用能
使四方知罪爭歸舊好之田三家變色願執陪

臣之禮聖人之成務也若乃乘機動用歷聘栖
遑神經幽顯志大宇宙東西南北推心於暴亂
之朝恭儉溫良授手於危亾之國道之將行也
命道之將廢也命歸齊去魯發浩歎於衰周厄
宋圍陳奏悲歌於下蔡聖人之救時也若乃筐
篚六藝笙簧五典拆旋洙泗之間揆隲唐虞之
際三千弟子攀睿化而升堂七十門人奉洪規
而入室從周定禮憲章知損益之源反魯裁詩
雅頌得絃歌之首備物而存道下學而上達援

神敘教降赤製於南宮運斗陳經動玄符於北
洛聖人之立教也若乃觀象設教法三百八十
四爻四十有九窮神知化應萬一千五百五十
有五成變化而行鬼神觀陰陽而倚天地以鼓
天下之動以定天下之疑索衆妙於重玄纂羣
微於太素聖人之贊易也若乃靈襟不測睿視
無涯石罅昭集隼之庭土缶驗簞羊之井嵇山
南望識皓骨於封禺蠡澤東浮考丹萍於夢渚
麟圖鑑遠金編題佐漢之符鳳德鈎深玉策筮

亾秦之兆聖人之觀化也時義遠矣能事畢矣
然後拂衣方外脫屣人間奠楹興夕夢之災負
杖起晨歌之跡撓虹梁於大廈物莫能宗摧日
觀於魯丘吾將安仰明均兩曜不能遷代謝之
期序合四時不能革盈虛之數適來夫子時也
適去夫子順也爲而不有用九五而長驅成而
勿屈撫雲霓而高視聖人之應化也自四教遠
而微言絕十哲喪而大義乖九師爭大易之門
五傳列春秋之輻六體分於楚晉四始派於齊

韓淹中之妙鍵不追稷下之高風代起百家騰
躍攀戶牖而同歸萬匹驅馳仰陶鈞而共貫猶
使絲黃金石長懸闕里之堂荆棘蓬蒿不入昌
平之墓聖人之遺風也遵揚十聖光被六虛乘
素履而保安貞垂黃裳而獲元吉故能貴而無
位履端於太極之初高而無名布政於皇王之
首千秋所不能易百代所不能移萬乘資以興
衰四海繇其輕重雖復質文交映瞻禴祀而長
存金火遞遷奉琴書而罔絕蓋易曰觀乎人文

以化成天下又云聖人以神道設教而萬物服
焉豈古之聰明睿智神武而不殺者夫國家襲
宇宙之淳精據明靈之寶位高祖武皇帝以黃
旗問罪杖金策以勞華夷太宗文皇帝以朱翟
承天穆玉衡而正區宇皇上宣祖宗之累洽奉
文武之重光稽曆數而坐明堂陳禮容而謁太
廟八神齊饗佇旒太史之宮六辨同和駐蹕華
胥之野文物隱地殷名動天樂繁九俗禮盛三
古冠帶混并之所書軌八紘閭閻兼匝之鄉煙

火四極竭河追日夸父力盡於楹間越海陵山
豎火塗窮於廡下薰腴廣被景貺潛周乾象著
而常文清坤靈滋而衆寶用溢金膏於紫洞雨
露均華栖玉燭於玄都風雷順軌丹萸翠茵藻
繪軒庭鳳彩龍姿激揚池御殊徵肸鬻不召而
自至茂祉昭彰無幽而不洽雖復帝臣南面降
衢室而無爲岱畎東臨陟名山而有事靈命不
可以辭也大典不可以推也繇是六戎宵警橫
紫殿而撓金五校晨驅蹴玄雲而噴玉星羅海

運嶽鎮川淳登碧墀而會神祇御玄壇而禮天
地金箱玉冊益睿算於無疆玳撿銀繩署靈機
於不竭功旣成矣道旣貞矣歷先王之舊國懷
列聖之遺塵翔赤驥而下雲亭吟翠虬而望鄒
魯泗濱休駕杳疑汾水之陽尼岫凝鑾暫似峒
山之典乃下詔曰可追贈太師託鹽梅於異代
鼎路生光寄舟楫於同時泉塗改照咸亨元年
又下詔曰宣尼有縱自天體膺上哲合兩儀之
簡易爲億載之師表顧唯寢廟義在欽崇如聞

諸州縣孔子廟堂及學館有破壞并向來未造
生徒無肄業之所先師闕奠祭之儀久致飄零
湮非敬本宜令諸州縣官司速加營葺九隴縣
學廟堂者大唐龍朔三年鄉人之所建也爾其
州分化鳥境狗罇鷗縈錦室於中區託銅梁於
古地玉輪斜界神龍蟠沮澤之雲石鏡遙臨寶
牒秘禺山之影天帝會昌之國上照乾維英靈
秀出之鄉俯清地絡庠序繇其糾合纓弁所以
會同文翁之景化不渝智士之風猷自遠於是

雙川舊老攀帝獎而翹心三蜀名儒想成均而
變色揆周規於舊宅詢漢制於成都開基於四
會之躔授矩於三農之隙土階無級就擊壤於
新歡茅茨不剪易層巢於故事莊壇文杏卽架
椽欒夾谷幽蘭爰疏戶牖儀形莞爾似聞沂水
之歌列侍間如若奉農山之對緇帷曉闢橫紐
帶於西河絳帳宵懸聚青衿於北海雖秋禮冬
詩之化以洽於齊人而宣風觀俗之規實歸於
上宰銀青光祿大夫譙國公諱崇義大武皇帝

之支孫河間大王之長子高秋九月振玉贊於
唐丘寶算千齡躍璇蚪於大渚我國家靈命東
朝抗裘冕之尊宗子維城南面襲軒裳之重折
玄元之胤緒擁朱虛之祿位拜玉節於秦京輝
金璋於蜀郡玄機應物潛銷水怪之災丹筆申
冤俯絕山精之訟魏文侯之擁篲道在而兼尊
董相國之垂帷風行而俗易司馬宇文公諱純
河南洛陽人也皇根帝緒列五鼎於三朝青鎖
丹梯跨千尋於十紀仲舉澄清之轡未極夷塗

士元卿相之材先登上佐冰壺精鑒遙清玉壘
之郊霜鏡懸明下映金城之域縣令柳公諱明
字太易河東人也梁岳之英長河之靈沐雲漢
之精粹荷天衢之元亨旌旗赫奕於中古珪組
陸離於下葉鳳巖抽律擢層秀於龍門驪穴騰
姿吐榮光於貝闕自朱絲就列光膺令宰之榮
墨綬馳芬高踐郎官之右仙鳧旦舉影入銅章
乳翟朝飛轂含玉軫臨叩客位自高文雅之庭
彭澤賓門猶主壺觴之境曠懷足以御物長策